

四庫全書

史部

欽定四庫全書

史部

欽定八旗通志卷

一百三十八至
一百三十九

欽定四庫全書

欽定八旗通志卷一百三十八

人物志十八

大臣傳四

滿洲鑲黃旗四

華善

額楚

陳秉

直拉哈達武穆薦

鄂善

顧八

代佟國綱佟國維

華善

華善滿洲鑲黃旗人姓伊爾根覺羅世居佛阿拉

祖塞楞鄂哈思瑚

國初來歸華善其五世孫也順治元年任筆帖式二年授雲騎尉五年遷刑部主事九年

恩詔加騎都尉世職十年遷本部郎中十三年八月隨寧海大將軍伊爾德勒舟山海寇陳六御阮思華善率所部舟師直前陷陣身被數創力戰馘斬二人部卒繼進遂敗賊舟山平敘功加一雲騎尉康熙元年同吏部郎中陳一炳赴廣東安輯降卒三年疏報偽都督杜輝率偽官百餘員兵二千餘來獻

南澳地偽將軍張雄鄭夢蛟偽監軍莊夢侯等各
繳偽關防牌劄投誠給口糧願歸農者安置從戎
者入伍章下所司五年授兵部督捕理事官七年
遷太僕寺卿八年授內宏文院學士九年五月

命巡撫甘肅疏言寧州地處邊鄙土瘠賦重近因歲歉民
逃地荒請將本州錢糧照真寧縣一例徵收其逃
荒地丁豁免從之十二年三月疏言鞏昌所屬西
和禮縣去歲疫癘盛行牛驢倒斃亦衆若待請始

賑恐播種愆期災民殘喘難待已發帑銀買耕牛
給籽種計口量賑部議華善違例擅發應令賠補
詔優免十三年冬陝西提督王輔臣叛於寧羌十四年正

月叛黨趙士昇等犯鞏昌蘭州勢孤華善檄甘肅
提督張勇總兵孫思克王進寶來援未至蘭州遊
擊董正己應賊城且陷官民固請華善以身免作
恢復計二月華善乃與按察使伊圖自蘭城出西
渡河至永昌與勇進寶會議進取策疏請

賜勅假勇事權得便宜行事

詔授勇靖逆將軍華善偕勇進寶出蘭州臨鞏路令寧夏鎮
陳福出靖遠路思克防大靖蘆塘索橋等處各分
兵進嗣進寶先渡河東華善慮其軍孤遣遊擊黃
鉉守備李守魁率騎進援至新城進寶與賊戰鉉
等從旁掩擊陣斬數百級擒賊將李廷玉郭虎三
月進圍蘭州時叛將潘瑀據洮州曾文耀據河州
厄魯特達爾加岱成等乘隙入寇肆掠人口牛畜

四月華善乃留進寶伊圖圍蘭州親統兵赴臨洮
勦禦遣土司楊朝樑攻洮州副將楊三元攻河州
並逐厄魯特人衆出境瑀文耀遁走遂復河洮二
城河西乃寧閏五月華善領兵圍鞏昌賊困突出
我兵奮擊多斬獲賊敗入城輔臣遣將李國樑援
鞏華善發兵邀截掘濠塹於鞏城斷賊出路六月
賊降復鞏昌同日進寶復蘭州諸疏入

上嘉勞之先是厄魯特人犯河州漢回民被誘出關華善

患之遣官招撫七月三元招回馬嘉錦馬應才等
萬餘人復其業十五年三月華善與勇議伏羌為
秦鞏要路恐賊襲取遣遊擊安守正劉廷棟等防
守未幾賊來襲伏羌官兵剿禦擒斬無數

諭旨加獎八月疏言臨鞏二府地瘠民貧自逆賊蹂躪土
荒民散請免十四年逋賦銀七萬八千八百三十
餘兩糧六萬八百餘石其已輸者抵十五年正賦
下部議行九月以病乞休得

旨地方初定正資料理著殫心供職無以病免尋卒于官
長子瑪思泰襲職卒襲除

額楚

額楚滿洲鑲黃旗人先世居薩哈勒察姓烏扎拉
世祖章皇帝順治二年內大臣和洛輝統師駐防西安道
經河南明總兵劉洪起既降復叛據西平縣城和
洛輝督兵樹雲梯攻剿護軍昂海先登額楚繼之
遂克其城敘功予雲騎尉世職尋授佐領屢遇

恩詔晉世職至三等輕車都尉十五年從大軍取貴州明年凱旋隨副都統噶楚哈瑪爾賽至荊州聞海賊鄭成功犯江寧由大江趨援噶楚哈令額楚為鑲黃旗營總合江寧駐防兵擊敗賊衆敘功晉世職二等輕車都尉尋授駐防江寧協領擢副都統聖祖仁皇帝康熙七年授江寧將軍十三年逆藩耿精忠叛應吳三桂遣賊將由福建陷江西廣信建昌饒州等府徽州及婺源績溪等縣俱從逆額楚奉

詔同署副都統宗室巴爾堪率兵往剿逆賊萬餘于績溪
縣西北迎戰額楚督兵奮擊陣斬偽副將一及賊
衆三千餘擒從逆把總劉成功斬之復績溪遂復
徽州府城賊將據休寧縣之新嶺倚險立寨額楚
分步兵左右擊騎兵由中路進攻破鹿角毀木柵
斬賊五百餘乘勝進剿至婺源賊皆潰遁婺源亦
復額楚奉

詔征饒州擊賊於樂平縣之段家村斬二千餘級進薄樂

平東門前鋒叅領巴特瑪樹雲梯登城賊兵五百
餘由西南二門出遁額楚遣兵追襲擒斬過半進
次鄱陽縣大磯莊賊由雲髻峰下來犯額楚遣巴
特瑪等列陣奮戰賊敗潰從逆饒州叅將陳九傑
時為偽都督棄城遁入鄱陽湖額楚撫定城中人
民賊旋由湖中駕船三百來犯額楚督兵射殪三
百餘賊以礮擊毀賊十餘船餘賊俱竄遁十四年
四月額楚率兵剿賊萬年縣至石頭街渡口遠望

隔岫分布賊營十數處賊船二百餘橫踞渡口額
楚令步兵直趨渡口集戰艦發鎗礮密令騎兵乘
夜由上流潛渡繞出賊營後水陸夾擊殪賊數千
盡獲賊船陳九傑就擒伏誅餘賊棄城遁賊之在
安仁者皆乘船遁我兵追及之賊以風逆泊船拒
戰旋自焚其船棄資械奔竄萬年安仁二縣悉平
五月剿賊弋陽賊將蔣得輅等率賊五萬于城北
樹木柵十有五又以五千餘賊分踞西崗橋額楚

分兵為二攻毀木柵奪取西崗橋賊卻入城我兵
登城攻克擒斬偽遊擊張三奇偽都司張明德胡
中甲等先後擊斬及溺水死者二萬餘賊十五年
簡親王喇布自江寧移師南昌額楚奉

詔叅贊軍務吳三桂賊將高大傑等突陷吉安據之額楚
同將軍哈勒哈齊率兵攻克外城與賊相持賊將
馬寶韓大任引賊數萬來援額楚迎戰於螺子山
等處屢失利會安親王岳樂自秦州進征湖南圍

長沙馬寶聞急趨救吉安賊衆食盡乘夜出南門
奔逸

上遣侍郎班第察奏螺子山戰敗罪以額楚不能舉發首
先敗走之人又賊遁不行追擊罪無可諉應罷任
革世職

命以世職仍領江寧兵立功贖罪率兵赴廣東十六年九
月賊將胡國柱馬寶率賊萬餘犯韶州額楚師次
蓮花山賊逼營額楚督兵禦擊會將軍莽吉圖自

城中出兵夾擊大敗賊賊由帽峰山遁追擊至樂

昌仁化

詔莽吉圖進駐梧州額楚守韶州十二月

諭曰韶州地屬緊要一切軍務額楚若啟簡親王轉奏恐
多遲誤其令額楚以江寧將軍印統轄兵馬事許專奏

十七年

詔同都統勒貝率兵進駐梧州叅贊莽吉圖軍務時廣東
總兵祖澤清復叛自高州勾結山海諸賊犯電白

額楚奉

詔會剿擊却賊衆進駐藤縣遇大疫士馬多病斃額楚以聞

命別擇要地移駐額楚旋疏言吳逆據鬱林容縣潯州聲言三路來犯藤縣軍營未可動移但士馬缺乏應請增遣以備剿禦

上命其仍駐藤縣

諭將軍舒恕於南雄韶州兵內擇有馬者發額楚軍未至

賊犯藤縣額楚同巡撫傅宏烈率兵禦擊失利退保梧州賊陷藤縣十八年二月賊將吳世琮犯梧州額楚同莽吉圖傅宏烈擊卻之賊併力犯南寧城中食盡時降鎮馬承蔭守南寧遣人告急額楚與莽吉圖舒恕勒貝分兵四路趨援擊賊於新邕西山之巔斬殪無算世琮負創奔逸南寧圍解額楚駐守永淳十九年六月額楚奉

詔還江寧二十年十月卒於任以兄子格克里之次子富

努保襲二等輕車都尉世職富努保尋卒以格克
里長子法保襲初格克里於康熙十四年以六品
官從大軍征廣東剿叛鎮馬雄偽將軍董重民等
於電白縣戰歿於陣二十五年議卹予雲騎尉世
職以法保併襲合已襲之職為一等輕車都尉

陳秉直

陳秉直滿洲鑲黃旗人姓陳佳順治六年由貢生
授山東平陰知縣七年土賊周魁軒犯境陳秉直

擊斬其衆獲馬羸三百餘賊不敢犯十年遷山東
膠萊運判十二年山東巡撫耿淳奉

詔保舉知府陳秉直以薦授福建泉州知府十六年遷山
東鹽運使明年遷山西河東道康熙三年擢河南
按察使定例按察使承問案件舛錯二十次以上
者革職二十次以下者降罰有差六年陳秉直承
問四十六案內外錯九案例止罰俸刑部遺漏總
數咨吏部議處奉

旨按察使係承理一省刑名今這九件即舛錯九次殊屬
溺職陳秉直著革職嗣陳秉直訴於刑部部臣以遺漏
總數檢舉得

旨復職八年補陝西按察使九年調江南按察使十二年
遷浙江布政使十三年六月大軍剿逆藩耿精忠
戶部侍郎達都赴浙督餉會巡撫田逢吉以疾解
任授達都為巡撫達都疏薦陳秉直年壯才優民
心悅服堪任巡撫部議不准

特旨允陳秉直陞浙江巡撫達都仍以原銜督餉時方停
杭州織造併入江蘇二局十二月疏言絲利產自
浙江奏銷絲價較江蘇減省若停止織造不特機
張朽廢可惜且工匠失業將來復設所費尤多請
仍留杭州織造衙門將裁減緞八千餘足於江蘇
杭三處均減戶部議不准

諭會同工部內務府再議從之十四年二月疏言楚浙等
省軍興需餉浩繁而地經蹂躪額賦難徵當此籌

餉之際在外除武臣及佐雜微員照常支俸外其
督撫司道府廳州縣等官常俸全捐充餉俟事平
支給軍需不無少濟下部議行時精忠逆黨據餘
姚大嵐山閏五月遣都司王得福等剿之擒斬賊
渠魯朝全等十餘人降偽總督褚楚白等復遣拔
誠偽總兵韓六合剿賊首何應龍邵天衢等斬獲
甚衆先後招撫偽官汪飛龍陳渭等一百五十餘
人兵五千餘得

旨嘉獎十七年以裁省各項錢糧十萬七千有餘議敘加
兵部右侍郎留巡撫任十八年三月自陳議以浮
躁應降三級調用奉

旨陳秉直著降三級仍留原任七月疏言杭屬田少山多
恃以養生辦課者惟桑麻竹木今駐防旗廝皆有
額設錢糧草料乃以打柴為名四出戕伐致小民
俯仰無資臣每加嚴禁但以罪止鞭責無所畏忌
請

勅部禁止犯者嚴加治罪議從之八月以吏科給事中李宗孔劾陳秉直察吏無能賢否混淆解任二十五年十二月卒

拉哈達

拉哈達滿洲鑲黃旗人姓鈕祜祿尚書車爾格第五子也初任侍衛兄法固達襲父騎都尉兼雲騎尉世職

世祖章皇帝順治七年因其祖額亦都以來世有勞績晉

三等輕車都尉尋卒拉哈達襲職兩遇

恩詔晉至一等輕車都尉十七年授兵部督捕侍郎十八年擢工部尚書列議政大臣

聖祖仁皇帝康熙三年授鑲黃旗蒙古都統八年調本旗滿洲都統十三年四月授鎮東將軍駐防兗州時逆藩耿精忠叛應吳三桂犯浙江拉哈達甫至兗州奉

諭曰杭州為浙江要地以爾素有才能遣往暫理杭州將

軍事務並

諭以浙江一應軍務與平南將軍賚塔總督李之芳等公
同商酌毋分彼此七月賊自溫處犯金華拉哈達遣副
都統沃伸偕副將陳世凱等迎擊大敗之擒斬偽
都督閆標等及其偽官百七十餘兵七千餘時賊
分犯黃巖台州寧波紹興俱騷動提督塞伯哩屢
疏告急

上既命康親王傑書為大將軍統師赴浙貝子傅喇塔為

寧海將軍分兵赴台州援剿復

詔康親王未至之先援剿事宜俱聽賚塔與拉哈達商酌
以行及康親王至金華

上命副都統雅塔哩署杭州將軍拉哈達仍以都統赴康
親王軍前叅贊軍務十四年五月拉哈達分兵擊
賊於處州復松陽宣平二縣十五年九月隨康親
王進征福建耿精忠乞降時海賊鄭錦踞漳泉興
化賊將許耀率賊三萬逼福州營於烏龍江之南

石門山枕峯山拉哈達率兵渡江奮擊奪其營十
四追奔四十餘里擒偽總兵四偽副將以下三十
餘人十二月授寧海將軍十六年同賚塔進剿興
化連破賊營二十六斬偽總督趙德勝復興化偽總
兵郭維藩以仙遊降許耀竄泉州據城拒守拉哈
達乘夜進圍之漏未盡梯城入斬許耀及偽總兵
偽副將等泉州平遂復漳州及海澄等十縣沿途
招降賊將四百二十二員兵四千一百七十名移

師征潮州叛鎮劉進忠迎降拉哈達還福州十七
年四月鄭錦之偽總統劉國軒臨平和犯海澄拉
哈達遣副都統瑚圖等擊賊於碧落泉潛石山河
灣及紅蕉寨葛布山皆有斬獲賊斷江東橋及長
泰同安諸小徑我師不能進海澄遂陷副都統穆
赫林提督段應舉死之漳平同安惠安相繼失守
賊復犯泉州

詔責拉哈達不急援海澄俟事平論罪嚴趣其禦賊泉州

拉哈達欲由長泰大路進值江水泛漲沉溺難行
時侍讀學士李光地丁憂家居遣人來迎請為嚮
導拉哈達遂率兵由南靖之峯蒼嶺朝天嶺至漳
平招降在城之偽總兵黃瑞標張勝等及偽官二
十餘兵四百有奇復踰石柱嶺趨安溪進薄泉州
賊乃竄遁十八年拉哈達遣遊擊趙雲剿賊於泉
州之臭塗澳斬五百餘級焚其寨先是賊逼泉州
於沿海東石地築城掘壕扼金門廈門要害至是

拉哈達遣副都統沃伸率兵攻之水陸並進冒鎗礮登城斬偽叅將遊擊數員擒偽總兵陳深及賊衆百六十餘人餘賊溺死者無算獲其偽印及船礮器械十九年拉哈達同巡撫吳興祚由同安港口進至潯尾招降賊寨分兵徑渡拉哈達居中吳興祚由左總兵王英由右直趨廈門而齊塔與總督姚啟聖提督萬正色楊捷總兵黃大來等皆如期至三面合擊賊不能支遂克之隨遣兵趨金門

偽總兵吳國俊等迎降鄭錦遁臺灣

詔康親王還京拉哈達與副都統馬思文率兵千人守福

州二十一年八月

上以進取臺灣有綠旗兵及駐防漢軍足用滿洲兵可撤

命拉哈達率之還京二十二年王大臣等議拉哈達當賊

陷海澄時不能救援應降世職為三等輕車都尉

罷都統

上念其隨康親王平閩有勞績且久任都統能稱其職寬

免革任二十四年以老病致仕四十二年七月卒
年七十有七

子祭塋如例子博雅桂襲

武穆篤

武穆篤滿洲鑲黃旗人姓富綦祖穆哈連世居葉
赫天聰時來歸武穆篤初任護軍叅領順治十五
年從信郡王多尼征明桂王朱由榔由貴州趨雲
南擊敗其將李成蛟於涼水井李定國於雙河口

進至盧鳴定國列象陣拒戰敗之十六年追至磨
盤山又敗之以功授雲騎尉十八年從靖東將軍
濟什哈剿山東土寇于七至棲霞縣之鋸齒山圍
其寨敗賊黨俞三呂四奇等于七竄入海康熙八
年擢前鋒叅領十三年三月逆藩耿精忠據福建
反

詔以貝子傅喇塔為寧海將軍武穆篤為前鋒統領從征
師由浙江進十一月至台州賊將魯實陳列營

黃瑞山欲犯天台武穆篤偕副都統吉爾塔布提督塞白理奮擊敗之至蒲塘敗偽總兵吳臣又敗偽將軍楊德十四年八月大兵至涼蓬隘口殺賊伏兵幾半賊夜遁武穆篤與提督段應舉護軍統領費雅思哈等追擊於黃土嶺賊潰退據黃巖縣圍其城賊帥曾養性遁偽官二十兵三千迎降遂復黃巖九月次上塘崩養性糾偽都督馬士玉張廣文等水陸兵三萬拒戰武穆篤統前鋒衝擊大

敗之身被數創擒斬偽官六十餘獲甲械無算復
太平樂清青田三縣及大荆磐石二衛十五年八
月大兵自處州啟行至雲和縣石塘嶺賊據險守
其地當温州入閩之衝傳喇塔檄副都統沃申總
兵陳世凱奪其山寨武穆篤與費雅思哈四等塔
布囊和濟格爾道員姚啟聖統應援兵乘大霧直
搗賊巢十七年七月創發卒於軍喪至京

遣領侍衛內大臣奠茶酒十九年八月

上以武穆篤効力行間勞績茂著

特命照實授前鋒統領議卹晉騎都尉世職

賜祭葬謚襄壯雍正七年入祀昭忠祠子綑色孫富昌遞襲騎都尉乾隆十七年

勅查陣亡世職官襲次已完者子孫

特予恩騎尉准襲一次以武穆篤曾孫祿全襲

鄂善

鄂善滿洲鑲黃旗人姓納喇順治十五年任三等侍

衛

聖祖仁皇帝康熙三年遷二等侍衛七年九月授秘書院
學士八年九月遷副都御史九年閏二月疏言近
例官員罰俸事在陞任前者罰已陞之俸事在降
調前者計未降之俸追銀均此處分而先後輕重
互異請

勅議畫一俾永遠遵循疏下吏部議仍復

世祖章皇帝時舊制無論陞降並罰現任俸其裁缺給假

丁憂者俟補官扣抵免行追四月授陝西巡撫十
一年四月擢山西陝西總督尋以山西歸巡撫
統轄改鄂善為陝西總督十二年九月改舊駐貴
陽之雲貴總督專轄貴州增設雲南總督調鄂善
任之十二月至湖廣值逆藩吳三桂反雲貴已陷賊

詔鄂善暫留湖廣與總督蔡毓榮共籌勦禦十三年正月
上聞賊逼沅州鄂善與蔡毓榮及提督桑額皆在荊州

諭趣桑額赴援改鄂善雲貴總督隨大軍進征二月桑額

率兵渡江賊已自沅州進陷常德澧州桑額仍退
守荊州尋部議蔡毓榮失守所屬城邑應革職鄂
善不能遵

旨籌畫機宜應降五級調用均得

旨從寬留任戴罪圖功四月鄂善疏言標下需兵惟自陝
搗至健丁一百五十名堪以入伍現在召募罕應
請於附近湖廣各省抽調步兵一千四百名陝西
省抽調馬兵四百五十名成標兵二千長驅進剿

并請以陝西安遠營叅將張夢椒為臣標中軍副將陝西提標守備李國梁為臣標左營遊擊陝西督標千總馮德昌為臣標中營守備俾收得人之效疏下部議附近湖廣各省步兵俱當防守汎地陝西馬兵本省需用皆未便抽調仍令鄂善在湖址酌募其標下中軍副將等官已由部選授張夢椒等應留陝西原任六月鄂善復疏言欲募有隣里保結之兵漫無一應由楚人止就本省之募不

就滇黔之募也其自願投充者慮係逃人或為奸
宄無益有害萬不敢招轉盼入秋大軍進剿湖南
招徠降兵即可撥補營伍請

勅領兵王將軍等於恢復之日陸續驗發充額疏下部議
從之十二月陝西提督王輔臣叛於寧羌州秦州
平涼俱陷

詔鄂善同副都統穆舒渾等率現駐襄陽之滿洲蒙古兵
移守興安漢中十四年正月鄂善至西安總督哈

占以省會兵少奏留鄂善與穆舒渾率所攜之兵
協守尋

詔移守榆林延安哈占兩奏止之六月遣營總鄂爾博什
邁圖等援邵陽擊敗叛將李師膺於鳳凰山獲偽
劄旗礮八月

上諭責哈占曰前以延安為諸路要衝曾命鄂善駐守哈
占奏留之西安致延安陷沒迨將軍畢力克圖恢復延
安人命鄂善速往安撫殘黎保固疆土乃至今未行皆

由哈占但知有西安置他處於度外也是月鄂善移駐
延安尋奏招回復業人民六萬二千餘得

旨嘉獎十六年六月率兵分守棧道以東郿縣各山口七
月賊由洪河口至塘坊廟列衆二千來犯鄂善令
右翼兵擊賊山澗左翼兵擊賊河岸而自領中營
兵踴躍直前仰攻山梁斬馘百餘賊自相蹂踐越
山而遁是月授甘肅巡撫十七年七月以失察布
政使伊圖侵蝕採買價值部議革職

詔從寬留任先是正月清水縣民控告知縣佟國臣苛斂
各款鄂善令按察使舒椒布勘鞫舒椒布檄秦州
知州王之鯨就近質訊延擱數月至是清水縣民
赴京叩

聞

上遣吏部郎中丹岱等往鞫昌察審得實十八年正月還
奏佟國臣革職計贓論絞舒椒布王之鯨懸案逾
限擬降調鄂善於所屬貪贓不先察究及告發仍

不審劾已經革職擬革任得

旨從寬與舒椒布並任事如故五月因計典察議才力不及無級可降罷任還京尋卒

顧八代

顧八代滿洲鑲黃旗人姓伊爾根覺羅父顧納禪
太宗文皇帝天聰九年由閑散隨征明大同攻小石城先
登

賜號巴圖魯予騎都尉世職尋任叅領

世祖章皇帝遣師入山海關及平定陝西河南江南浙江
顧納禪皆在事有功晉職三等輕車都尉世襲罔
替卒子顧蘇襲遇

恩詔晉二等輕車都尉尋卒子佛岳襲顧八代為顧納禪
次子順治十六年以廩生充護軍隨征雲南得功
牌二凱旋授戶部筆帖式尋因佛岳卒無子襲二
等輕車都尉世職擢任吏部文選司郎中康熙十
四年

聖祖仁皇帝御試旗員列第一改翰林院侍講學士會逆

潘吳三桂踞湖南遣賊將掠廣東廣西鎮南將軍

莽依圖由江西進定廣東駐韶州十六年六月

上命顧八代傳

諭莽依圖規復廣西

方畧即留營隨征顧八代既至莽依圖進駐梧州屢擊敗

賊將吳世琮等十八年京察掌院學士拉薩哩葉

方藹以顧八代隨征稱職政勤才長注考大學士

索額圖改注浮躁傳

旨下部察議吏部言浮躁例應降調顧八代有世職令隨
旗行走尋莽依圖疏言顧八代襄辦軍務竭誠奮
勉三載以來運籌決勝動合機宜請留軍前委署
副都統叅贊軍務得

旨仍以原銜隨征十九年廣西既定莽依圖卒於軍顧八
代隨平南大將軍賚塔進征二十年師至雲南顧
八代同叅贊大臣穆占等與勇畧將軍趙良棟定

攻取策賚塔從之遂殄滅逆孽吳世璠平雲南凱旋補侍講學士二十三年入直

上書房二十四年擢內閣學士充

平定三逆方畧副總裁官二十五年充

經筵講官明年授禮部侍郎二十八年擢本部尚書

三十二年九月奉

旨顧八代因在內廷供奉有年屢加擢用洊至尚書今觀其人不宜部院著革任以世職隨旗行走仍直內廷三

十七年因疾乞休四十七年十二月卒

世祖憲皇帝雍正四年

諭曰原任禮部尚書顧八代品行端方學術醇正昔蒙

皇考簡用服官有年當征剿吳逆時以學士協贊軍務從

將軍莽依圖賚塔等克復粵西滇南勞績茂著備承

恩眷且深知品學優長足為模範

特命為朕兄弟之師朕自幼與共朝夕講論忠孝大義研
究經書至理肫誠周至獲益良多嗣以公事註誤罷職

仍在內廷課讀數載抱疾閒居戊子冬物故朕親臨其喪並遣人為之經理殯葬本欲陳情於

皇考之前求加恩賜卹值

聖體違和不敢瀆奏迄今回憶當年誦讀情景宛然如昨
老成舊學時眷於懷應優加贈卹以展朕篤念師資酬
獎前勞之意尋

允部議復禮部尚書銜加贈太傅

予祭塋如典禮謚文端立碑墓道

上復念其子孫甚貧

恩賞銀一萬兩八年七月

命建賢良祠於京師

特諭應入祀者滿洲大臣五人大學士圖海都統賚塔次
即顧八代及尚書瑪爾漢總河齊蘇勒先是顧八
代乞休後子顧儼襲因銷

恩詔所加之職改三等輕車都尉雍正三年由叅領擢任
鑲黃旗漢軍副都統見大臣表顧儼之子顧琮別

有傳

佟國綱

佟國綱滿洲鑲黃旗人姓佟佳輕車都尉佟養正之孫都統佟圖賴長子也初隸漢軍管佐領任一等侍衛

聖祖仁皇帝康熙元年襲父三等子尋任內大臣十四年察哈爾布爾尼作亂

上命撫遠大將軍信郡王鄂扎統師討之授國綱安北將

軍往鎮宣府賊平乃還十六年因佟圖賴為

孝康章皇后之父追贈一等公以國綱襲二十年授鑲黃
旗漢軍都統二十二年充教習烏鎗兵丁總管二
十七年疏言臣先世因在撫順倡率明人來歸故
隸漢軍其初實係滿洲曾蒙

太祖高皇帝諭令與佟佳氏之巴都哩蒙阿圖諸大臣考
訂支派敘明族譜今請仍歸滿洲事下部議以佟
姓官職衆多應仍留漢軍現任國綱本支准改入

滿洲是年俄羅斯遣使費耀多囉等至尼布楚請
定邊界

命國綱同內大臣索額圖等往議既抵色稜額因噶爾
丹侵掠喀爾喀

召還令遣人曉諭費耀多囉等緩期得其復書奏

聞明年四月同索額圖等往尼布楚定議以額爾固訥河及
格爾必齊河為界立碑垂示久遠二十九年七月

命撫遠大將軍裕親王福全征噶爾丹以國綱叅贊軍務

八月朔師次烏蘭布通噶爾丹於隔岸林中卧駝
於前而兵伏其後國綱率兵奮勇進擊賊突發烏
鎗國綱中鎗遂歿於陣觀至京

命皇子及內大臣侍衛迎奠茶酒及將葬

諭領侍衛內大臣曰佟國綱為國効力忽爾陣亡每一思
之痛不能已必須一視其喪朕心庶幾少慰國綱弟國
維及諸臣叩阻再三乃

命諸皇子及上三旗大臣侍衛部院大臣皆往送

賜祭葬如典禮謚忠勇以長子鄂倫岱襲一等公其陣亡
所得之騎都尉又一雲騎尉世職以第三子夸岱
襲

世宗憲皇帝時贈國綱太傅入祀昭忠祠並

勅立家廟

佟國維

佟國維滿洲鑲黃旗人都統佟圖賴次子順治十
七年任一等侍衛

聖祖仁皇帝康熙九年授內大臣十二年冬逆藩吳三桂反其子吳應熊居京師明年春逆黨謀為不軌以紅帽為號國維發其事奉

命率侍衛三十人至大佛寺擒縛十數人械送刑部鞫實伏法二十一年授領侍衛內大臣尋列議政大臣二十八年因國維為

孝懿仁皇后之父封一等公二十九年七月大軍征噶爾丹

命國維叅贊軍務八月次烏蘭布通國維與兄都統佟國綱並率左翼兵進擊國綱循河岸戰歿國維由山腰遠賊後擊之潰遁師還以噶爾丹既敗不率兵追剿部議革職得

旨罷議政降四級留任三十五年

上親征噶爾丹國維從甫出獨石口以駝載遲滯疎於管攝自請處分

上貫之三十六年復從

上征噶爾丹至寧夏聞噶爾丹竄死

上回鑾敘前隨征功復所降四級四十三年

詔賑山東流民之就食京師者以國維同內大臣明珠等
監賑尋以年老解任四十八年正月

名國維與諸大臣並集傳

旨詰問曰前因有人為皇太子條奏朕降硃筆諭旨示諸
大臣爾曾奏稱皇上辦事精明天下人無不知曉斷無
錯誤之處此事於聖躬闕繫甚大若日後易於措處祈

速賜睿斷或日後難於措處亦祈速賜睿斷總之將原定主意熟慮施行為善爾係解任之人此事與爾無涉乃身先衆人啟奏是何心哉國維奏曰臣雖以庸愚解任蒙

皇恩優厚因

聖體違和冀望速愈故奏請速定其事今奉

明旨詢問實無詞以對奏入奉

諭曰將來誠如爾言朕有難於措處自不必言衆人亦將

謂爾所奏果是矣若朕無難措處到彼時自知之耳人其可懷私仇而妄言乎明日復

諭曰爾年老之人屢向朕所遣人云每日祝天求佛願皇上萬壽朕思自五帝以至今日尚未及萬載朕何敢侈望及此此皆以荒誕不實之言欺朕朕不信也爾既有祈望朕躬易於措處之言嗣後惟篤念朕躬不於諸皇子中結為黨羽謂皆係吾君之子一體看視不有所依附而陷害其餘即俾朕躬易於措處之要務也二月又

諭曰爾前此易於措處難於措處等語竟似捨命陳奏爾
乃國家大臣榮貴極矣年已老邁子孫甚多若欲捨命
則見朕之病勢漸增即當親身入內奏云醫生等既可
入內我又何不可入親身領醫生診看晝夜侍奉湯藥
使朕疾得痊方可稱為實心乃漠不相關並未嘗念及
朕躬朕仍賴皇太子及諸皇子晝夜侍奉率領醫人診
看進藥調理仰蒙

上天護佑今已痊愈由是觀之爾並非實心乃置身兩可

意謂皇上若獲痊愈我仍沾祿食苟且度日倘有不測則皇太子將何所往必合我言矣此非爾之本意乎皇太子允初前染瘋疾朕為國家而拘禁之後詳察被入鎮魔之處將鎮魔物俱令掘去其事乃明今調理痊愈始行釋放朕將此情由俱曾硃筆書出詳悉諭諸大臣今譬有人因染瘋狂持刀砍人安可不行拘執若已痊愈又安可不行釋放而必欲殺之乎朕拘執皇太子時並無他意殊不知爾之肆出大言激烈陳奏者係何心也

諸大臣之情狀朕已知之不過碌碌素餐全無知識一聞爾所奏之言衆皆恐懼欲立允禩為皇太子而列名保奏矣朕臨御既久安享太平並無難處之事臣庶託賴朕躬亦各安逸得所今因爾所奏之言及羣下小人就中捏造言詞所以大臣侍衛官員等俱終日憂慮若無生路者此事關係甚重亂臣賊子自古有之今觀衆人情狀果中爾所奏日後難於措處之言矣爾聞外邊匪類妄言理應禁止爾乃倡造大言驚駭衆心有是理

乎爾既捨命陳奏必有確見其何以令朕躬及皇太子
諸皇子志意安舒不至殷憂亦可明白陳奏朕特降此
旨非欲誅爾也因衆皆憂慮須事明後衆心乃可定爾
當體念朕心若懷藏私意別有作為

天必誅之國維奏曰臣前所奏之言俱載在檔案今並不
推諉衆人因臣大言妄奏皆畏懼列名致貽

聖體及皇太子諸皇子之憂臣罪莫大

皇上雖憐憫不誅臣何顏生斯世祈速

賜誅戮以示衆奏入復奉

諭曰朕今特為安撫羣下降旨申明非欲有所誅戮也爾前啟奏時外間匪類不知其故因盛讚爾云如此方謂之國家大臣不懼死亡敢行陳奏今爾之情形畢露人將謂爾為何如人耶洵可耻之極矣朕若誅爾似類沽名朕今斷不誅爾其坦懷勿懼但不可卸責於朕躬觀爾迷妄之狀其亦被人鎮懾歟五十八年正月卒

賜祭葬如例

世宗憲皇帝雍正元年贈太傅謚端純子隆科多襲一等

公爵

欽定八旗通志卷一百三十八

欽定四庫全書

欽定八旗通志卷一百三十九

人物志十九

大臣傳五

滿洲鑲黃旗五
邵克遜 瓦岱

米思翰 傅拉塔
薩布素 尹泰

米思翰

子李榮保

米思翰滿洲鑲黃旗人姓富察哈什屯長子也康熙三年由侍衛襲父一等男兼一雲騎尉管佐領事六年任內務府總管時輔政大臣有欲假用尚

方器具者米思翰嚴拒之不以予

聖祖仁皇帝既親政知其守正不阿授禮部侍郎八年擢

戶部尚書旋列議政大臣先是各省歲賦聽布政使存留司庫每有那移虧缺之弊米思翰疏請通飭各省自俸饗諸經費所餘悉解部由是勾稽出納瞭如指掌是時天下一統邊境戢寧而尚可喜鎮廣東耿精忠鎮福建藩屬將弁咸情遊驕縱吳三桂鎮雲南尤自恣要請無已俸饗多浮糜輸輓

滋勞費十二年可喜請撤藩移遼東三桂精忠亦
以是請疏下戶兵二部議米思翰與兵部尚書明
珠等議令俱撤藩移山海關外時廷臣有言三桂
不可撤者以兩議入奏米思翰堅持宜撤得

旨允行既而三桂叛

聖祖命王貝勒大臣率八旗兵征討議者以軍需浩繁宜
就近調兵禦守米思翰言賊勢猖獗非綠旗兵所
能制宜以八旗勁旅會勦之至軍需內外協濟足

支十年可無他慮於是請以內府所儲分年發給
復綜核各省庫金倉粟以時撥運奏悉稱

旨十三年六月偕戶部諸臣疏言大兵勦賊屢奉

明詔以正賦給軍需恐有司尚多借端私派請

敕各督撫嚴察所屬凡供應糧餉薪芻一切動用官帑毋

許苛派其購自民間者務視時價支給勿纖毫累

民奉

諭如議速行是年十二月卒年四十有三

聖祖軫恤備至

予祭塋如典禮謚敏果方吳三桂耿精忠相繼叛滇黔楚
蜀閩粵悉為賊據人謂撤藩實速之生變為持議
者危之

聖祖嘗諭廷臣曰朕自少時以三藩勢焰日熾不可不撤
豈因其叛誅過於人耶及逆賊殄平

聖祖追憶持議諸臣猶

諭稱米思翰弗置子四馬斯喀馬齊馬武別有傳第四子

李榮保襲一等男兼一雲騎尉初任侍衛兼佐領
遷護軍叅領前鋒叅領至察哈爾總管乾隆元年
馬齊疏陳米思翰勞績得

旨入祀賢良祠二年以

冊立

皇后彝典追封李榮保一等公予其第四子富文一等
侯爵十三年

冊諡

孝賢皇后

推恩先世追封米思翰一等公以富文襲十四年李榮
保第十子大學士忠勇公傅恒經畧金川功成凱
旋

賜建宗祠春秋致祭自哈什屯始米思翰李榮保並入
祀追謚李榮保曰莊愨

傅拉塔

傅拉塔滿洲鑲黃旗人姓伊爾根覺羅康熙九年

由筆帖式授內閣中書十七年遷內閣侍讀十九
年授山東道御史時海寇未平福建提督萬正色
以總兵吳定方等攻奪賊船擒賊十一人疏請議
叙部議以所獲有本汛奸人出境貿易者不准所
請傳拉塔疏言內地奸民與海賊勾通往來既就
擒獲不議叙官弁恐巡緝懈怠且有受賄隱縱諸
弊非所以安民弭盜請

敕部酌定章程得

昔奸民出海貿易情罪重大其本汛拏獲者亦應議叙著
為令二十五年授陝西布政使明年三月內擢左副都
御史七月遷工部右侍郎十月以商人採輸楠木
工部監收遲延議降調

上念傅拉塔在部未久且舊任布政使頗優寬免之十一
月轉左侍郎二十七年正月

命同禮部侍郎多奇往雲南察審提督萬正色與總兵王
珍互訐事既啟行調刑部右侍郎四月授兩江總

督傅拉塔至雲南鞠訊得實正色與珍論罪有差
七月傅拉塔陞辭往江南

諭曰爾此行當潔已奉公前任兩江總督無如于成龍者
爾效其所行可矣先是贛縣民控告知縣劉瀚芳私徵
銀米十餘萬並蠹役不法事總督董訥發司道集
勘傅拉塔甫抵任劾布政司多宏安按察司吳延
貴贛南道鍾有德於吏役婪贓事不即勘鞠遷延
歲餘復從輕定擬曲為庇護請

敕部嚴議多宏安及延貴有德並罷任二十八年

上南巡

諭江浙為人文之地入學額數應酌量加增下督撫詳議
傳拉塔會同浙江總督王鵬議就大中小各學取
入原額每二名加增一名二十九年二月淮徐所
屬饑傳拉塔先發常平倉積穀賑卹入奏稱

旨五月疏劾大學士徐元文原任刑部尚書徐乾學縱子
弟招搖納賄爭利害民巡撫洪之傑徇私袒庇事

得

旨免究劾欵令元文休致回籍會沭陽縣民周廷鑑叩

閤訟降職侍郎胡簡敬占產誣良巡撫洪之傑瞻徇

狀傳拉塔奉

命勘鞫得寔簡敬及其子弟治罪有差之傑革職先是給

事中何楷奏定科舉額數部議每中舉人一名准

生員六十名應試是年八月傳拉塔署巡撫監臨

鄉試明年疏言臣於去年署巡撫事入場之際儒

生千百成羣以未得預試環向泣訴臣以定額不敢私增慰諭散去第江南士子每科應試者俱萬有餘人今限以額數減去三分之二擔囊負笈而來不得觀光場屋一展所長殊堪憫惜若得廣增科舉之額必當益加砥礪以副作人之化疏下部議增六十名為百名三十二年廣東巡撫江有良巡鹽太常寺少卿沙拜互訐

命傅拉塔赴廣東察勘得受贓不法各狀江有良沙拜俱

革職三十三年四月疏言淮揚所屬多半荒田撫
臣宋犖曾疏請緩徵部議未允臣履畝詳勘鹽城
高郵等州縣因遇水災業戶逋逃者衆今田有涸
出之名人無耕種之寔小民積困之餘熟田額糧
尚多懸欠何能代賠盈萬之荒賦倘拘責地保里
隣逃亡益多是使熟田盡變荒田於

國課毫無裨益請

恩賜蠲除則逃戶聞風懷歸安居樂業矣部議水浸之田

業已涸出不准蠲賦

上特諭曰糧從地出地為水沒若徵錢糧則於民甚苦此水浸之田糧皆令免徵閏五月卒於官遺疏上得

旨傳拉塔宣力年久簡用總督以來廉潔自持寔心奉職
茂著勤勞其從優議卹復

諭大學士等曰兩江總督居官善者自于成龍以來惟傳
拉塔一人能和而不流不畏權勢愛恤軍民深副朝廷
委任之意

特遣太僕寺卿楊舒赴江寧致祭傳

諭江南官弁士民曰爾等悲感傷痛朕亦聞知向來在外
官員溘逝從未有此遣祭之例也尋部議

賜祭塋

命加祭一次贈太子太保謚清端予騎都尉世職以其子
雙喜襲兩江士民為建祠於江寧四十四年

駕幸江寧經雨花臺

上指其祠曰傅拉塔居官甚優大有氣節人雖受劾無銜

怨者

特賜額曰兩江遺愛

世宗憲皇帝雍正十年以傅拉塔入祀賢良祠

鄂克遜

鄂克遜滿洲鑲黃旗人姓富察父鄂通武

世祖章皇帝時隨征俄羅斯奮勇進戰獲其船叙功予騎

都尉世職尋卒以鄂克遜襲康熙十二年逆藩吳

三桂反奸民楊起隆乘機作亂詐稱朱三太子糾

黨鄭得勝黃吉陳益等約於京城內外放火舉
事潛聚鼓樓西街已故降將周全斌家全斌子
公直甫出首告鄂克遜行過鼓樓值火起升屋
望之賊已披甲露刃鄂克遜知有變遂馳告兵
部尚書明珠都統圖海等率兵圍之賊益縱火
流矢如雨鄂克遜奮勇先入斬十餘人生擒陳
益黃吉復率衆捕獲鄭得勝等於燈市口十三
年正月以叅領銜隨征吳三桂至江西南昌賊

陷龍泉縣偽將軍陳昇偽總兵陳邦俊據石灰澳
隘口南有山都澳偽副將劉鳴贊據之北有河塘
澳偽副將黃世標據之各立營壘築土排椿內列
礮銃擁衆萬餘我師分隊進擊鄂克遜攻奪石灰
澳隘口遂乘勝破山都河塘二澳賊壘賊衆潰遁
躡擊二十里直抵曹林攻取十餘寨焚其糧糗獲
器械無算遂復龍泉縣有偽將軍朱姓者與偽總
兵黃乃忠合兵復來犯鄂克遜隨副都統幹都海

擊敗之十五年四月偽將軍高大傑糾賊三千據吉安北關列陣施放鎗礮鄂克遜攻剽其壘賊衆奔潰我師乘勝掩殺賊兵墜壕溺水死者甚衆未幾偽將軍馬寶韓大任引賊數萬來援戰於螺子山大軍失利鄂克遜突前衝擊身受數創所乘馬中鎗倒鄂克遜墜地即躍起大呼步殺數人賊有騎花馬者奪乘之復入陣收戰士屍擊賊益力殿後以還十七年二月韓大任竄萬安走福建鄂克

遜隨將軍額楚分路進勦敗賊於汀州之老虎洞焚其營寨殲賊六千餘七月隨征南將軍穆占勦賊湖南時護軍統領拉賽署前鋒統領薩克察自安仁赴永興為賊所困穆占令鄂克遜送米四十四船火藥一船接濟遇賊拒阻鄂克遜屢敗之船乃得達十八年二月勦賊將郭應輔吳國貴等於永州斬獲甚衆十九年十月進征貴州至新田衛擊走偽將軍韓天邦師次鎮

遠偽將軍張足法楊應選乘夜遁鄂克遜率兵
躡擊殺殆盡進克偏橋興隆二衛穆占令鄂克
遜襲取重安浮橋大軍得濟進取平越抵貴陽
二十年二月進征雲南偽將軍胡國柄率衆萬
餘列象陣以拒鄂克遜奮勇衝擊奪歸化寺
東西二營雲南平凱旋二十五年授江寧駐防
佐領二十七年六月湖廣裁兵夏逢龍作亂鄂
克遜隨振武將軍瓦岱討平之三十六年遷協

領四十一年六月擢江寧副都統四十六年三

月

上幸江寧鄂克遜奏陳節次出兵事尋擢江寧將軍

特旨嘉獎叙前戰功予騎都尉世職合所襲騎都尉為三

等輕車都尉五十七年以老病乞休

予原品致仕雍正七年正月卒年八十有六

賜祭葬如典禮謚武襄子傳學襲職

元岱

瓦岱滿洲鑲黃旗人姓鈕祜祿額亦都之孫也父
教德

太宗文皇帝天聰八年分額亦都舊轄人戶益以新附瑚
爾哈部衆授教德世管佐領尋兼任叅領屢從征
有功

世祖章皇帝順治二年叙功予騎都尉世職遇

恩詔洊晉二等輕車都尉十四年卒長子謨爾琿襲瓦岱
教德第三子也初任侍衛尋授護軍叅領

聖祖仁皇帝康熙十三年逆藩耿精忠叛應吳三桂由福建掠江西瓦岱署護軍統領隨安親王岳樂往討十四年三月擊賊於撫州鍾家嶺而中創仍率兵擊退賊衆之乘夜犯營者偽都督易明偽總兵李茂桂分路來犯俱戰却之又敗賊衆於瑞州府北山招降東鄉縣賊城既復移兵征建昌偽將軍邵連登率賊數萬水陸迎戰瓦岱與定南將軍希爾根分兵列陣山下賊據山以拒瓦岱從山左鳴角

仰攻擒斬無算連登中矢殪餘賊潰奔截其歸路
獲賊船六十餘復建昌城乘勝圍新城縣率兵樹
雲梯先登克之十五年二月隨安親王討吳三桂
逆黨夏國相以萬餘衆據萍鄉縣之來龍山瓦岱
偕諸將分道進擊賊敗遁遂復縣城進征湖南屢
敗賊衆十八年大軍復長沙衡州寶慶並規復武
岡渡紫陽河賊營分據渡口諸軍直前攻戰瓦岱
引兵繞出賊營後夾擊賊潰遁追斬二百餘級擒

爲都司一復連敗賊衆於雙井鋪及楓木嶺湖南
郡邑相繼底定瓦岱隨安親王還京授護軍統領
叙功予雲騎尉世職二十一年授江寧將軍二十
三年

駕幸江寧

賜御用袍並銀千兩二十四年十月授鑲黃旗滿洲都統
以博濟代爲將軍

上諭之曰前此將軍副都統與地方官各不相能自遣瓦

岱為將軍衆志克諧彼此和協爾當效之瓦岱既至京
列議政大臣二十七年

命為振武將軍統兵赴湖北勦叛賊夏逢龍等師至黃州
偽總兵趙得等出城降黃岡生員宜畏生以逢龍
獻磔於軍前賊平班師三十年

命為定北將軍率兵出張家口赴圖拉追勦噶爾丹至克魯
倫河偵賊衆遠去乃還三十一年二月

上允理藩院請於邊外達勒鄂莫瑚爾鄂莫諸處墾種派

內務府各莊屯及八旗諸王莊屯丁壯往耕

命瓦岱同都統班達爾沙等管理

諭以善為經營及時廣播油麥大麥糜黍諸種深耕勤耨
俾多收穫十月以督耕不勤田禾無收部議降一級遂
罷任削去雲騎尉尋卒於家

薩布素

薩布素滿洲鑲黃旗人姓富察四世祖充順巴本
太祖高皇帝時由岳克通鄂城率丁壯屯吉林遂家焉薩

布素初由領催授驍騎校遷協領皆在吉林康熙
十六年四月

聖祖仁皇帝以長白山為本朝

肇迹發祥宜崇秩祀

欽遣內大臣覺羅武默訥侍衛費耀色塞護禮索額等前
往瞻視六月至吉林欲選曾往者導引弗可得寧
古塔將軍巴海令協領薩布素率兵二百携三月
糧以隨循溫德亨河陸行七日至卓隆鄂河復乘

舟由幹努呼河逆流二日至佛多和河順流一日
抵訥殷陸路為林木所阻翼日薩布素率兵伐木
開路行三十餘里陟山巔升樹而望又行數里登
高峯望之遣人還告武默訥望見片片白光即長
白山計相距止百餘里矣武默訥等後一日至復
開路行一日詰朝又行雲霧塞徑恍惚聞鶴鳴六
七聲尋聲疾走因得鹿蹊密林叢翳進至山麓跪
誦

敕旨畢雲霧忽開有路可登半山石砌若平臺五峯環拱
南一峯稍下如門山水左流為松花江右流為大
小訥殷河中潭不流者周三十餘里由潭邊陟山
五十餘丈香樹紛郁黃花燦爛徧地積雪即向所
望見片片白光也薩布素曰此地人跡罕到不宜
久留遂叩拜而返至山麓有羣鹿自山奔墜時竚
立視者七人鹿適仆其七薩布素謂武默訥曰此
山靈所贈也令從者繫之以行不數十步回首瞻

望已雲霧彌山矣仍由訥殷行十五日乃還吉林
八月武默訥等入奏

勅禮臣詳議尊封長白山之神秩祀如嶽鎮自是春秋望
祭於吉林城西南九里溫德亨山永著為典十七
年八月擢薩布素寧古塔副都統二十一年八月
上遣副都統朗坦朋春率兵赴黑龍江時俄羅斯人來邊
境者咸稱為羅刹郎坦朋春奉

諭曰羅刹犯我黑龍江邊境昔曾發兵進討未獲剪除近

又侵入精奇哩江諸處恃雅克薩城為巢穴蔓延益甚
爾等往偕寧古塔副都統薩布素率兵至達呼爾索倫
遣人赴尼布楚諭以捕鹿之故因詳視陸路遠近沿黑
龍江行圍徑薄雅克薩城下勘其居址形勢度羅刹斷
不敢出戰若以食物來餽可受而量答之其自黑龍江
至額蘇哩舟行水路及額蘇哩通寧古塔之路擇隨行
之叅領侍衛同薩布素往視十二月郎坦朋春還奏雅
克薩城易取狀

上命建木城於黑龍江呼瑪爾二處調寧古塔兵一千五百往駐造船艦運礮具以薩布素同將軍巴海統之二十二年四月薩布素與巴海奏言黑龍江呼瑪爾距雅克薩城尚遠若駐兵兩處則勢分道阻且過雅克薩有尼布楚等城羅剎倘水路運糧增兵救援更難為計宜乘其積貯未備速行征勦一俟造船畢度七月初旬能抵雅克薩即統兵直薄城下疏下議政王大臣議如所請

上以所議七月進攻未協機宜令再議因

諭曰寧古塔兵未諳行軍紀律將軍與副都統分管又不能齊心巴海可留守吉林薩布素同寧古塔副都統瓦禮祜領兵前往俟抵彼相度形勢奏請酌行尋

允王大臣議額蘇哩在黑龍江呼瑪爾之間可以藏船且有田隴舊跡宜建立木城令薩布素瓦禮祜統兵駐守七月索倫總管博克等招降羅剎三十一人詔賞其頭目二人衣帽赴薩克素軍前効力九月

命前鋒統領郎坦會商駐兵事宜尋奏言額蘇哩今年七月即經霜雪若於來秋移寧古塔兵往駐恐地寒霜早諸穀不穫難以餬口應就近移達呼爾兵五百人先於來春赴額蘇哩耕種量其秋收再以寧古塔三千餘兵分為三班更番駐防

上曰兵丁頻事更番必致困苦非長久計宜在黑龍江建城永戍豫備礮具船艦設斥堠計程置驛有警則乘蒙古馬疾馳常時按程以行由水路陸續運糧積貯黑龍

江仍設將軍副都統領之十月調薩布素為黑龍江將軍十一月疏言前自羅刹來歸之宜番鄂噶番席圖頒三人効力勤勞宜與新投誠之吉禮過哩鄂佛那西等酌給官職以示鼓勵得

旨授宜番驍騎校餘授七品官其新投誠之鄂佛那西等賜裘帽令馳驛赴薩布素軍前酌遣招撫二十三年二月疏報營總鄂羅舜抵羅刹界遣宜番等招撫二十一人以歸七月疏請今年暫停攻剿俟來年四月

進兵

上曰前遣侍衛關保傳諭薩布素率水陸兵丁刈羅刹所
種田禾則雅克薩城自困薩布素亦言羅刹田禾應行
踏毀今乃奏請暫停是坐失機宜矣薩布素尋以失誤
軍機上疏請罪

上以薩布素現在領兵請勅

諭部俟事竣察議

命都統瓦山侍郎米丕與薩布素會議師期二十四年正

月奏言我兵于四月杪水陸並進攻雅克薩城倘
萬難攻取則刈其田禾

上諭王大臣曰薩布素所奏四月進兵不過刈取田禾事
必無成此皆謫遣黑龍江狂悖之人從中沮議不欲成
事而薩布素出身微賤高視若輩不敢有違用兵所關
甚鉅宜周詳籌畫期于必克倘謀事草率羅刹將益肆
猖狂矣乃

命都統朋春鑾儀使林興珠臺灣投誠左都督何佑分率

八旗綠營兵及藤牌兵赴黑龍江會勘五月抵雅克薩遣人以書諭之不從薩布素同朋春等軍在城南集戰船於城東南列紅衣礮於城北將夾攻之先積柴城下為焚城狀城中大驚其頭目額里克舍窮蹙乞降先是薩布素屢奉

諭行軍不可多行殺戮至是朋春宣

上恩德額里克舍垂涕稽顙謝引六百餘人徙去我軍毀雅克薩城捷

聞

諭議政王大臣曰大兵迅速征行破四十年盤踞之羅刹於數日之間獲雅克薩城克奏厥績薩布素向來逗遛不進兵之罪概從寬免至雅克薩城雖已克取防禦決不可疎應於何地駐兵彈壓其速議具奏尋

允所請以副都統溫岱納秦駐守黑龍江薩布素移駐墨爾根建城防禦二十五年正月薩布素奏遣人往偵羅刹復至雅克薩築城盤踞請于冰消時督修

戰艦相機進剿

諭曰羅刹復築雅克薩城若不速行撲剿勢必積糧堅守
圖之不易其令薩布素暫停墨爾根處兵遷移家口速
修船艦統寧古塔等處兵赴黑龍江城酌留盛京兵守
之率所部二千人攻取雅克薩尋

命副都統郎坦班達爾沙領兵會剿八月奏言臣等遵

旨圍雅克薩城已三面掘壕築壘壕外置木椿鹿角分汛
防禦城西對江另設一軍於未流漸時泊船東西

兩岸令堵尼布楚援兵至流澌時即藏船上流之
港內以資守禦軍中馬匹有疲羸者請半發黑龍
江半發墨爾根令駐防兵飼秣得

旨如所請行九月俄羅斯察罕汗遣使上疏納款乞撤雅
克薩之圍

上諭以別遣使來議地界

命薩布素撤圍城兵列艦結營尋以俄羅斯使臣費糧多
囉等已抵喀爾喀土謝圖汗境

詔薩布素還駐墨爾根又以噶爾丹侵掠喀爾喀傳

諭費糧多囉等緩期定議二十八年四月費糧多囉等至

尼布楚

詔調黑龍江兵一千五百隨內大臣索額圖等赴尼布楚
定議令俄羅斯自毀雅克薩城徙其人去以格爾
必齊河北岸為彼界立碑垂示久遠二十九年薩
布素奏以前此索倫總管安珠瑚等所種官田二
千餘晌分給墨爾根兵丁屯種三十一年同寧古

塔將軍佟寶奏建齊齊哈爾城及白都訥木城以
科爾沁獻進之錫伯卦爾察達呼爾壯丁萬四千
有奇分駐二城編佐領隸上三旗並設防守尉防
禦等官三十四年遵

旨陳奏進勦噶爾丹豫備事宜言興安嶺北形勝之地索
約爾濟山為最已遣熟識路徑官兵自

盛京吉林墨爾根三路度至山遠近分置程站其無
水處掘井以待若山之東北呼倫貝爾諸處有警

則與臣駐軍之地近即率墨爾根兵先進吉林

盛京兵繼之若山之西烏勒輝諸處有警則

盛京兵先進臣率部下兵及吉林兵繼之皆會于索
約爾濟山以待

上可其奏又

諭曰聞噶爾丹順克噶倫河而至薩布素速即遠行偵探
倘賊犯車臣汗地聽酌量禦勦即踵其尾以進三十五

年二月

上親征噶爾丹由獨石口出中路大將軍費揚古由歸化

城出西路

命薩布素扼其東路

諭領侍衛內大臣等曰近聞噶爾丹將欲東行故令薩布素整兵設偵防其竄逸所派盛京寧古塔兵及科爾沁兵以薩布素總轄凡口外所報軍務悉使知之薩布素尋奏言各路調集之兵於四月初由索約爾濟山刻期進克魯倫河四月

上親臨克魯倫河噶爾丹西竄為費揚古所敗薩布素奉
詔就喀爾喀河附近擇好水草處秣馬六月

命率兵一千移駐科圖餘皆遣還七月

詔分所部兵五百隸費揚古軍三十六年正月

召還京尋令仍回原任九月疏報沿河被水之十八莊請

以舊貯糧米按丁散給

上曰薩布素前曾奏稱收貯糧米三萬餘石年久漸朽與
其積之腐爛何若散之為有益且出陳可濟軍糧易新

易于收貯其如所請行初邊境有墨爾哲勒氏屯長累
世輸貢康熙十年其屯長扎努喀布克托請率衆
內移寧古塔將軍巴海安輯之墨爾根編四十佐
領號為新滿洲三十四年薩布素奏於墨爾根兩
翼各立一學設助教官選新滿洲及錫伯索倫達
呼爾每佐領下幼童一名教習書義是為黑龍江
建學之始

上嘗問薩布素免死罪犯聚集黑龍江慮生事否薩布素

奏言兇徒俱分給新滿洲為奴勢孤力散惡不能逞至是

上憶其言以

諭大學士等曰人命所關重大朕數年以來凡盜案止誅首惡其從犯俱免死發遣黑龍江每慮聚集或致生事曾問及薩布素據所云則不惟全活甚衆且新滿洲亦資益良多矣三十七年四月奏錫伯達呼爾佐領阿穆瑚朗巴琳等曠誤防哨

諭曰薩布素任黑龍江將軍年久諳練地方事務亦得軍民之心錫伯達呼爾編入佐領已數年矣理合遵行禁令令曠誤防哨不可不嚴加處分佐領阿穆瑚朗巴琳俱革職交薩布素懲治嗣後若有此等不遵法紀者令薩布素酌量治罪以聞九月

上巡幸吉林

諭大學士等曰薩布素授任以來為國効力訓練士卒平定羅刹勤勞可嘉其子一等輕車都尉世職並以朕御

袍及纓帽於衆前宣諭賜之三十八年黑龍江副都統
闕保為其所劾罷之協領都爾岱許告濫用驛站
車馬諸款薩布素以許告在劾罷後陳奏

上以闕保未任副都統時久為侍衛

諭大學士等曰薩布素辦事明敏然器局卑瑣朕巡幸吉
林每見其逢迎近侍朕聽政多年何事未歷僉壬端良
夫豈不辨彼近侍何能為闕保各款俱實料薩布素不
能袒護可即令其察審尋覆奏察審闕保疲勞驛站擬

革職枷責

命從寬降五級調用三十九年五月薩布素奏黑龍江屯堡因災荒積欠米石請俟豐年陸續交倉得

旨前因羅刹侵擾內地是以駐兵黑龍江設立官堡遣員屯糧原欲多積米石厚備軍儲仍令革任總督蔡毓榮經理二十堡薩布素曾奏其皆有成效後因其十二堡荒棄無收復請停止屯種將壯丁改歸驛站其餘官堡逋課日多并從前貯存倉米支散無餘致駐防兵餉匱

乏薩布素難辭其咎令明白回奏八月奏言官屯耕種
雖未失時而地氣早寒秋霜損稼又累經水旱不
能支納官糧兵丁餬口無資因以舊存倉米按丁
支放由臣庸劣不能遠謀所致至前奏蔡毓榮所
管十二屯堡停止耕種罪實難辭今請以齊齊哈
爾根駐防之兵丁每年輪派五百人遣往錫伯等
處耕種官田督令未及霜降悉行收穫夏秋間以
船貯穀運至齊齊哈爾倉收存其所買耕牛田畝

籽種先於備存俸餉內支用俟次年收穫日扣還
歸款則糧儲裕而兵餉可充疏下戶部察議尋議
錫伯諸處屯種事宜應如所請行其以蔡毓榮荒
廢之屯地妄報成效實屬瞻徇又以貯存穀石混
行給散不能嚴飭兵丁屯種納糧應令賠償運穀
一千二百三十餘石歸倉并請

旨嚴加治罪

上命侍郎滿丕等前往察訊四十年正月滿丕等奏薩布

素徇私控報屯種浮支倉穀應斬得

旨免死革任并革去一等輕車都尉世職在佐領上行走
尋授散秩大臣未幾卒

尹泰

尹泰滿洲鑲黃旗人姓章佳初由翰林院筆帖式
補

起居注主事康熙十九年遷內閣侍讀二十七年授
翰林院侍講充

日講起居注官明年轉侍讀三十四年遷國子監祭酒三十七年授錦州佐領五十二年以病罷雍正元年正月擢內閣學士三月遷工部右侍郎七月轉左十月擢左都御史十一月疏言六科書吏賄通提塘造為小抄晚帖開寫口傳

諭旨或誤繙清文甚至將

皇上賞賜及問對之處任意捏造應請禁止有捏造傳發者治罪二年二月疏陳文武各官頂帶補服坐褥

俱照品級等差毋許僭越又官民服用黑狐及黃色米色香色應嚴禁並從之尋充會典總裁三年四月疏請御史試俸一年期滿如未能深信者再試一年俾賢否可詳察得

旨俞允五月以原品署

盛京禮部侍郎兼管奉天府府尹事八月疏言奉天府所屬承德等九州縣存貯米豆甚多倉廩不敷前府尹鄒汝魯請以地丁糧內折二徵銀為建倉

之費以雍正元年二年為則本年折二之例應停
臣思粟米多貯有益兵民之口食黑豆多貯無用
且易朽難久請自雍正四年為始按畝徵米按丁
徵銀停徵黑豆俾民免輓運之勞官省倉廩之費
又前府尹廖騰燧請每年米豆十分借三與民春
借秋還奈關外地廣民居距城遠一借一還搬運
甚難多不願者州縣拘例按丁派借雖豐年亦必
拖欠請令民願借者赴領不願者聽即以其餘照

時價糶銀秋收買補則上有出陳易新之實政下
無按丁派借之苦累又言錦縣寧遠州廣寧縣莊
穀應征積欠九十餘萬石若盡需建倉工費不貲
關東風高土燥康熙年間所收莊穀有害收者每
窖貯穀千石經二十年無紅朽請擇近城高燥地
掘窖貯穀可免繫費倘年久或有變色酌糶以免
霉沴亦疏通一法也九月疏言凡部事俱有定限
處分奉天將軍及五部之事有經年不完者又有

應接之事而推諉不應接之事反接辦者易滋弊
竇請歲遣御史一員稽查如有前弊據實叅處則
事內牽連人無久待之苦亦無越職之嫌諸疏並
下部議行四年十月山海關總管多索禮交莊頭
餘地尹泰因方運米不及派官丈收多索禮以尹
泰藉端推諉請嚴審

命吏部侍郎查郎阿往鞠議降調得

旨解府尹任仍以左都御史協理奉天將軍事五年閏三

月將軍噶爾弼奏言

盛京海洋應增設水師營尹泰疏稱錦州復州蓋州
海洋係達登州海口非大海比且旅順口天津俱
有水師營儘可輪班巡察若增設則製船造房及
兵餉等項需費浩繁究于巡察無益下議政王大
臣議令噶爾弼尹泰畫一具奏兩人仍各執前說
諭曰盛京添設水師營如果于巡察有益即多費錢糧亦
應舉行若屬無益何用添設議政王大臣再議尋議如

尹泰所奏停止六年八月以遺漏入官家產財物
革職先是康親王壯丁裴含章訐告尹泰抑勒入
官房價強賣奴僕等款尹泰解任來京下刑部鞠
訊得含章父交官帑因監追挾讐誣控狀尹泰事
得釋十一月

特旨開復七年正月

諭曰滿漢大學士俱各全備辦理妥協無容再增因

聖祖仁皇帝時所有年久老臣今在朝者甚少時深注念

尚書陳元龍左都御史尹秦歷事

聖祖多年屢經任使雖年近八旬而精力尚健著加恩授額外大學士以示優眷至意尋授尹秦

東閣大學士兼兵部尚書十一年二月充

玉牒館副總裁十三年冬恭修

世宗憲皇帝實錄

命尹秦充總裁乾隆元年三月以老病乞罷

溫旨慰留二年十月再疏乞罷

上未許三年七月復陳病哀日甚虛曠職守懇

子解退

命以原官致仕九月卒遺疏入

諭曰尹泰耆舊老成宣力年久

皇考簡拔于退休之後游陟綸扉寧靜和平奉職維謹去


年伊子尹繼善來京陛見朕因尹泰年邁授尹繼善

刑部尚書俾朝夕侍養伊以老病乞休朕慰留再三

始允所請昨舊病作遣太醫診視冀其痊可今聞溘

逝深為軫悼已命散秩大臣賜奠茶酒加太子太傅
於應得卹典外加祭一次以示優禮舊臣至意尋

賜祭葬謚文恪子尹繼善官至大學士自有傳



欽定八旗通志卷一百三十九